



# Communiqué de presse

## de l'Ambassade des Etats-Unis

14-16 rue Rainitovo, Antsahavola, Antananarivo 101 – Madagascar - Tel.: 261 20 22 212 57

Alakamisy 25 septambra 2008

Ny Alakamisy 25 Septambra no nomarihin' Atoa Neils Marquardt, Masoivoho Amerikana sy ny Sekreteram-panjakana Malagasy miadidy ny Filaminana Anatiny, Atoa Désiré Raasolofomanana, ny famaranana ny fandaharam-panofanana naharitra dimy volana natao hanatsarana ny fahaiza-manaon'ny fitondrana Malagasy eo amin'ny ady amin'ny fanondranana olona an-tsokosoko. Mpandray anjara maherin'ny 60 avy amin'ireo sampan-draharaha mpampihatra lalàna no nanaraka ilay fiofanana momba ny fomba fiasa mampiasa teknolojia avo lenta ho an'ny fanadihadiana heloka bevava sy ny fiofanana momba ny lalàna manan-kery ary ny fahaizana manatontosa fanadihadiana. Raha atambatra izany rehetra izany dia hita fa dingana lehibe eo amin'ny ady mitohy hamongorana ny fanondranana olona an-tsokosoko sy ny fanararaotana eto Madagasikara. Ho fanehoan'i Etazonia ny fahatsapany ny maha-zava-dehibe izany asa izany, dia nanolotra solosaina miisa telo ny Masoivoho, miaraka amin'ny *serveur* matanjaka iray sy ireo fitaovana fampiasa miaraka amin'izany solosaina izany, ho fanohanana ny asa hotontosain'ilay Ivon-toerana Fanadihadiana Heloka Bevava, izay vao najoro ho andry iorenan'ny ezaka rehetra eo amin'ity sehatra ity any aoriana.

Nararaotin' Atoa Masoivoho Marquardt izany lanonana izany hiarahabana ny fitondrana Malagasy noho ny asa tsara alain-tahaka notontosainy teo amin'ity sehatra ity hatreto, izay vao avy nankasitrahany Departemant-panjakana Amerikana tamin'ny volana Jona teo, tao anatin'ilay tatitra avoakany isan-taona momba ny fanondranana olona an-tsokosoko, ka nahatratraran'i Madagasikara ny sokajy ambony indrindra amin'ireo firenena maneran-tany noho ny fahavononany hiady amin'ny fanondranana olona an-tsokosoko. Notsindriany hatrany ny fahavononan'i Etazonia hanamafy orina kokoa ny fiaraha-miasa amin'i Madagasikara eo amin'ity sehatrady ity, ary nampirisihiny ny Ministeran'ny Fitsarana, ny Polisy ary ny Zandary hanohy hatrany ilay fiaraha-mientana tsy manam-paharoa nasehon'izy ireo, rehefa tonga ny fotoana anapariahana ilay fomba fiasa sy ilay teknolojia any ivelan'ny renivohitra.

Anisan'ny nandray anjara tamin'izao fandaharam-piofanana izao ny manam-pahaizana manokana momba ny fanadihadiana miisa 10 izay nanaraka fandaharam-piofanana maharitra enina herinandro momba ny fampiasana teknolojian'ny fikirakirana antontam-baovao hamantarana sy hanaovana fanadihadiana momba ny tambajotran'olon-dratsy. Ankoatr'izay dia nisy mpahay lalàna sy manam-pahefana avy amin'ny polisy sy zandary niisa 50 nandray fiofanana naharitra roa herinandro ary notontosaina in-dimy nisesy teto an-drenivohitra sy tany Fort Dauphin ary tany Nosy Be ; ka nireshana momba ny teknika ilaina manokana raha hanao fanadihadiana momba ny fanondranana olona an-tsokosoko. Ny antontam-baovao izay ao amin'ilay Ivon-toerana Fanadihadiana Heloka Bevava dia vao maika hanampy amin'ny fampivondronana ny antontam-baovao sy ny fanadihadiana ny vaovao toa izany manerana ny firenena. Noho izany dia vao maika ho azo itokisana sy hahomby ity fomba fiasa ity, ary hanampy ny fitondrana amin'ny fanaraha-maso akaiky kokoa ny antontan'isa mikasika ity heloka ity.

Ny Departemanta Amerikana misahana ny Fitsarana no namatsy vola izao hetsika izao, tamin'ny alàlan'ny Fandaharana Fanofanana Iraisam-pirenena momba ny Fahaizana Manadihady Heloka Bevava (ICITAP). Tafavory tao anatin'izao fandaharam-piofanana izao ny Ministeran'ny Fitsarana, ny Polisy ary ny Zandary, izay miara-nisalahy hamongotra ireo karazan-keloka saro-paritana mampiavaka ny fanondranana olona an-tsokosoko. Olana maneran-tany ny fanondranana olona an-tsokosoko, ary olona an-tapitrisany no ianjadian'izany heloka izany isan-taona; ka sady voahitsakitsaka ny zo maha-olombelona ireo olona ireo, mitombo ny loza mitatao ara-pahasalamana eto amin'izao tontolo izao, no vao mainka mitombo ny herin'ireo tambajotran'olon-dratsy. Hita miharihary ao amin'ny Madagasikara Am-Perinasa ny fahavononan'i

Madagasikara hiady amin'ity heloka iraisam-pirenena ity, ary nivoitra ihany koa tamin'ny fandaniana ilay lalàna feno miady amin'ny fanondranana olona an-tsokosoko, tamin'ny taon-dasa.